

四庫全書

子部

欽定四庫全書

子部

欽定授時通考卷四十九至五十一

詳校官中書臣竇汝翼

編修臣倉聖脈覆勘

總校官編修臣王燕緒

校對官主事臣胡敏

謄錄監生臣徐如浩

欽定四庫全書

欽定授時通考卷四十九

勸課

本朝重農

祈穀

謹案月令天子以元日祈穀於上帝蓋人君代天
理物欽若敬授未有不以農事為先務我

國家修明典禮尤重民生

太宗文皇帝繼天立極肇祀

郊壇

世祖章皇帝創業垂統乘時定制每歲孟春上辛祈穀于上帝一切典禮與冬至大祀同

聖祖仁皇帝釐定樂章禮文大備康熙二十八年復命另撰祈穀祝文將肫懇恤民之意切實祈求

世宗憲皇帝視民如傷盡誠盡敬每歲

躬祀

郊壇為民請命

天心協應疊降嘉祥薄海內外無不食德飲和仰蒙

福佑我

皇上御極以來閭澤覃敷深仁普洽蠲免賑恤之典史
不勝書凡閭閻之疾苦稼穡之艱難無弗洞悉周
知厪懷夙夜

齋宮淵穆對越精誠

皇衷之懇至肫勤視小民望歲之心尤切于萬萬惟

上帝監觀四方惟

列聖陟降左右錫茲祉福粒我蒸民至誠感神呼吸通于
帝座理固然矣蓋以民事為已事以

天心為已心

聖聖相承道同心一非明禋將享之文所能擬諸形容也

謹照

大清會典及禮部所定現行儀注載

祈穀禮儀於後

祈穀儀

凡上辛

祈穀前後儀節陳設順治初詳定遵行惟配享

神位遞增儀亦遞備今照題請儀注具列於後

一前期五日詣犧牲所視牲

皇帝親詣行禮遣官視牲

一前期三日太常寺官進齋戒牌銅人

皇帝致齋三日各衙門俱設齋戒牌應陪祀王以下各

官齋戒如常儀

一前期二日遣禮部堂官一員省牲

一前期一日

皇帝陞太和殿

視祝文

視玉

視帛

視香行禮復至龍亭前上香行禮太常寺官送祝文玉

帛香至

天壇神庫內青案上安設

一前期一日禮部都察院太常寺光祿寺官俱朝服上香監宰牲並座毛血

一正祭日鹵簿大駕全設

皇帝御禮服出宮乘輦

駕進

壇西門降輦至更衣幄次更衣祭服盥手畢進

大享殿內就拜位王以下陪祀各官俱序列燔柴迎
帝神奏中平之章

皇帝陞

壇詣

上帝香案前上香次詣

太祖高皇帝

太宗文皇帝

世祖章皇帝

聖祖仁皇帝

世宗憲皇帝位前上香畢旋位行禮唱奠玉帛樂奏肅平

之章

皇帝陞

壇詣

上帝位前獻玉帛次詣

太祖高皇帝

太宗文皇帝

世祖章皇帝

聖祖仁皇帝

世宗憲皇帝位前奠帛畢旋位唱進俎樂奏咸平之章

皇帝陞

壇以次進俎畢旋位行初獻禮樂奏壽平之章

皇帝陞

壇詣

上帝位前獻爵畢讀祝官跪讀畢

皇帝行禮復詣

太祖高皇帝

太宗文皇帝

世祖章皇帝

聖祖仁皇帝

世宗憲皇帝位前獻爵禮畢旋位行亞獻禮樂奏景平之
章

皇帝陞

壇以次獻爵如初獻儀禮畢旋位行終獻禮樂奏永平之章

皇帝陞

壇以次獻爵如前儀獻畢旋位太常寺官唱

賜福胙

皇帝就位受爵受胙行禮旋位復行禮謝福胙徹饌樂奏凝平之章捧玉官捧蒼璧退送

神樂奏清平之章

皇帝行禮職事官捧祝帛香饌恭送燎位望燎樂奏太平之章

皇帝詣望燎位祝帛焚半奏禮畢

皇帝由東轍門出更衣陞輦設鹵簿大駕教坊司作樂奏祐平之章

皇帝還宮

樂章

迎

帝神樂奏中平之章

惟帝勤民兮求莫匪舒
小民何依兮黍稷興與

元日有事兮百辟趨
為民請命兮食咸需

遙瞻龍駕兮歷紫虛
日臨黃道兮東風徐

臣深昭事兮遑寧居
願垂嘉惠兮大有書

奠玉帛樂奏肅平之章

民天惟食兮農事先
粒我蒸民兮有大田

風霆流形兮雨澤霑
實賴實粟兮氣化全

玉帛祇奏兮祇裡虔

仰祈寰宇兮享豐年

進俎樂奏咸平之章

鼎烹兮苾芬

嘉薦兮無文

奉雕俎兮大武

羶薌建兮氣干雲

昭普存兮民力

惟明德兮馨聞

初獻樂奏壽平之章

初獻兮旨酒盈

著誠致潔兮犧尊盛

儼對越兮在上

惟昭明兮有融

瑟黃流兮玉瓚

帝心歆假兮賚嘉禎

亞獻樂奏景平之章

著尊啟兮告虔

清醑次第兮舉前

禮再獻兮肅拜

列瑤觴兮秩斯筵

神悅懌兮如在

惠我嘉生兮福便便

終獻樂奏永平之章

終獻兮泰尊移

苾芬嘉旨兮圭瓚交馳

神既醉止兮錫祉

禮成於三兮陳詞

願灑餘瀝兮沐羣黎

臣拜手兮望雲霓

徹饌樂奏凝平之章

俎豆具陳兮庶品齊

舉荷昭鑒兮靡或遺

饌告徹兮玉几

登歌洋溢兮式禮無違

肅微忱兮告終事

上帝居歆兮錫純禧

送

帝神樂奏清平之章

祇奉天威兮弗敢康

小心翼翼兮昭穹蒼

雲垂九天兮露凜凜

翠旗羽節兮歸何鄉

臣拜下風兮意徬徨

願沛汪澤兮時其雨暘

望燎樂奏太平之章

翹首兮天閭

邈彼雲海兮何蒼茫

炳蕭束帛兮薦馨香

精誠咸格兮降福穰

四時順序兮百穀以昌

臣同兆姓兮感荷恩光

皇帝還宮導迎樂作奏祐平之章

皇天有命

列聖承之

我后配德

文匡武綏

海隅寧謐

神靈宴娛

於萬斯年

流慶降釐

耕藉

謹案仲春耕藉以供粢盛以重農事甚盛典也我

朝

列聖相承勤民務本

世祖章皇帝智勇天錫統一寰宇順治十一年

躬祀

先農行耕藉禮

欽定一切儀章為萬世法

聖祖仁皇帝聖神文武仁孝性成康熙十一年耕藉行告

祭

奉先殿禮

世宗憲皇帝仁育義正宵旰憂勤雍正二年以後每歲躬耕三推禮畢再行一推以示率先農功至意藉田嘉禾歲生至有十三穗者蓋

精誠感格若斯之盛也又

命直省郡邑各設藉田所在官吏遵行惟謹故自

開國以來大有頻書海內家給人足比隆于唐虞三代之盛我

皇上至誠大孝念切民依乾隆三年行耕藉禮四年照例舉行億萬斯年著為定例開蒸民粒食之源充六宇太和之氣山農野老熙熙然相忘于擊壤鼓腹之下者皆

聖主敬

天法

金匱要略卷之二十九
祖肫勤教育之深恩也謹遵照

卷四十九

大清會典及禮部所定現行儀注載

躬祀

先農壇

耕耤禮儀於後

祭

先農壇儀

皇帝舉耕耤禮則

親祭

先農壇其每年常祀定于春二月

順治十一年二月

世祖章皇帝行耕藉禮親祭

先農壇康熙十一年二月

聖祖仁皇帝行耕藉禮親祭

先農壇前期遣官告祭

奉先殿一應禮儀俱與順治十一年同雍正二年二月

世宗憲皇帝行耕耤禮親祭

先農壇一應禮儀與康熙十一年同以後每年舉行

乾隆三年二月

皇上行耕耤禮親祭

先農壇前期親祭

奉先殿四年二月

上親行耕耤禮如前儀

一前期二日太常寺官進齋戒牌銅人

皇帝致齋二日王以下陪祀各官俱齋戒二日

一前期二日太常寺官視牲

一前期一日

皇帝御中和殿視祝文畢太常寺官捧祝版送至

先農壇神庫內安設

一前期一日禮部都察院太常寺光祿寺官赴

壇監視宰牲瘞毛血

一正祭日

皇帝具禮服乘輦至

壇進具服殿盥手畢至

壇上黃幄次立王以下陪祀各官俱排立迎

神樂奏永豐之章

皇帝陞壇上香行禮初獻奏時豐之章職事官獻帛爵

讀祝畢

皇帝行禮亞獻奏咸豐之章終獻奏大豐之章各獻畢

奏

賜福胙

皇帝受爵受胙行禮謝福胙徹饌樂奏屢豐之章送

神樂奏報豐之章

皇帝行禮職事官捧祝帛香饌送座位樂奏慶豐之章
皇帝親視奏禮成退次行耕藉禮

皇帝親視奏禮成退次行耕藉禮

樂章

迎

神樂奏永豐之章

勾芒秉令

土牛是驅

天下一人

蒼龍駕車

念彼田疇

民命所需

生成有德

尚式臨諸

奠帛初獻樂奏時豐之章

先農神哉

耒耜教民

田祖靈哉

稼穡是親

功德深厚

天地同仁

肅將幣帛

肇舉明禋

厥初生民

萬彙莫辨

神錫之庥

嘉種乃誕

執茲醴齊

農功並見

玉瓚椒醑

肅雍舉奠

亞獻樂奏咸豐之章

上原下隰

百穀盈止

粒我烝民

秀良興起

樂舞具備

吹豳稱兕

再躋以獻

有馨酒旨

終獻樂奏大豐之章

糜芑秬秠

維神所貽

以神饗神

曰予將之

東耒三推

東作允宜

五風十雨

率土何私

徹饌樂奏屢豐之章

於皇農事

自古為烈

莫敢不承

今茲忻悅

籩豆既豐

簠簋云潔

神視井疆

執事告徹

送

神樂奏報豐之章

麻麥芄芄

秔稻連阡

縱橫萬里

皆神所瞻

人歌鼓腹

史載有年

歲有常典

第祿綿延

望瘞樂奏慶豐之章

玉版蒼幣

來鑒來歆

敬之重之

藏於厚深

典禮由古

予行自今

樂樂利利

國以永寧

耕藉儀

凡耕耤儀節係順治十二年題定康熙十一年增

告祭

奉先殿典禮雍正二年頒定樂章

—

躬耕藉田必用亥日

一前期一日遣官告祭

奉先殿

—

皇帝躬祭

先農壇行耕耤禮於前期

視祝版日設

皇帝耕耤耒耜鞭種青箱綵亭三座設三王九卿從耕
青箱綵亭四座於

午門外戶部禮部堂官同順天府堂官入進器具穀
種於

太和殿下安設

皇帝陞中和殿行

閱視祝版禮畢

皇帝御保和殿戶部堂官先捧

皇帝耕耤耒耜次捧鞭次捧稻種匣安設于

中和殿殿內正中次捧三王耕耤麥種匣穀種匣九
卿耕耤豆種匣黍種匣安設于

中和殿內左右畢

皇帝自保和殿陞中和殿至各陳設處

閱畢還

宮戶部官捧耒耜穀種各匣至

太和殿階下授順天府捧出

午門左門置各綵亭內教坊司作樂前導送至耕藉
所安設

一是日早

皇帝致祭

先農壇畢

執叉執扒執帚執鋤蓑衣斗蓬樂工二十名五色
彩旗樂工五十名順天府耆老三十四名上農夫
十名中農夫十名下農夫十名俱兩旁排立鴻臚
寺官贊進耒耜戶部堂官北向跪進耒耜

皇帝右手耒贊進鞭順天府尹北向跪進鞭

皇帝左手持鞭耆老二人牽牛上農夫二人扶犁禮部

太常寺鑾儀衛官恭導

皇帝秉耒行耕耨禮教坊司樂工鳴鑼鼓歌三十六禾

詞招颺彩旗唱和隨行

皇帝三推三返再行一推禮畢贊受耒耜戶部堂官跪
受耒耜贊受鞭順天府尹跪受鞭各置綵亭內禮
部堂官奏請

皇帝旋位立戶部堂官順天府尹執青箱播種耆老隨
後覆土畢順天府尹以青箱置綵亭內禮部堂官
奏請

觀耕

皇帝御觀耕臺南向坐不從耕王以下各官分翼序立
三王各五推五返各用耆老一人牽牛農夫二人
扶犁順天府廳官隨後播種耕畢三王退就班位
立諸王等俱候

旨序坐次九卿各九推九返各用耆老一人牽牛農夫
二人扶犁順天府廳官及兩縣各官隨後播種耕
畢九卿退就本班立順天府官將青箱置左右所
設三王九卿盛種綵亭內禮部堂官奏耕耤禮畢

駕輿由東階出

先農門外陞輦教坊司作導迎大樂至

齊宮陳設大樂作

皇帝陞座暫

御後殿王以下公以上在臺上文武各官在臺下東西

向按翼排立禮部堂官奏請

御齋宮樂作

皇帝陞座順天府官兩縣官率耆老農夫等由西門入

排立贊行三跪九叩頭禮農夫三十人服本等服
色各持農器隨後行禮丹陛樂作禮畢退至耕所
農夫終畝候耕畢府縣官至東門報終畝畢鴻臚
寺官跪奏

親耕既成禮當慶賀王以下各官排班丹陛樂作贊行
三跪九叩頭禮禮畢退就班行一叩禮序坐

賜茶畢大樂作

駕興御後殿光祿寺設宴畢大樂作

皇帝陞座王以下各官就原位行一叩頭禮序坐進宴
丹陛樂作奏雨暘時若之章安宴桌畢進酒西簷
下作管絃樂笙簫合奏奏五穀豐登之章

皇帝舉酒王以下各官于本位跪行一叩頭禮復坐進
饌東簷前作清樂奏家給人足之章徹樂王以下
各官排班聽贊行一跪三叩頭禮丹陛樂作禮部
堂官奏禮畢王以下各官出

齋宮大門外排立恭候

皇帝乘輦出鹵簿大駕前導教坊司作還宮樂奏祐平
之章

皇帝還宮

耕藉三十六耒詞

光華日月開青陽

房星晨正呈農祥

帝念民依重耕桑

肇新千藉考典章

吉蠲元辰時日良

蒼龍鑾輅臨天閭

青壇峙立西南方

犧牲簠簋升芬芳

皇心祇敬天容莊

黃幕致禮虔誠將

禮成移蹕天田旁

土膏沃洽春洋洋

儻犁行地牛服韁

司農種稔盛青箱

洪縻在手絲鞭揚

率先稼穡為民倡

三推一墾制有常

五推九推數遞詳

王公卿尹咸贊襄

甸人千耦列雁行

耰鋤既畢恩澤滂

自天集福多豐穰

來牟薈薈森紫芒

華薌赤甲秬稈秬

秬秠三種黎白黃

稷粟堅好碩且香

糜芑大穗盈尺長

五菽五豆充隴場

糝粢糜纂九色糧

蜀秫王黍兼東廩

烏禾同收除童梁

雙歧合穎邊理疆

千箱萬斛收神倉

四時順序百穀昌

八區九有富蓋藏

歡騰億兆感聖皇

皇帝進宴奏雨暘時若之章

祥開黼座分布瓊筵

笙歌迭奏兮天樂宣

五風十雨兮時不愆

皇心悅豫兮福祿綿

皇帝進酒奏五穀豐登之章

帝勤稼穡兮供粢盛

富教化行兮百穀成

黍稷重穋兮充棟楹

堯樽特進兮玉醴盈

勞酒禮飲兮邁鎬京

皇帝進膳奏家給人足之章

嘉禾炊饌兮雲子芳

仙廚瓊粒兮七箸香

吾皇重農兮禮肅將

明昭感格兮錫嘉祥

千倉萬箱兮百穀穰

崇墉比櫛兮遙相望

豐亨樂利兮遍八方

家多充積兮野餘糧

含哺鼓腹兮化日長

朝饔夕飧兮壽而康

萬國同慶兮璿圖昌

直省耕藉儀

雍正五年題准耕藉儀注頒行直省各擇東郊官地潔淨豐腴者立為藉田如無官地動支正項錢糧置買民田以四畝九分為藉田即於藉田後建立

先農壇供奉

神牌收貯祭品選擇勤謹農夫二名免其差役酌給口糧令居

壇西配房看守朝夕灑掃每歲耕藉之日祭

先農壇禮畢各官俱更蟒袍補服省城督撫秉耒知縣
執青箱知府播種府城知府秉耒佐貳執青箱知
縣播種知州正印官秉耒佐貳執青箱播種專城
衛所用正印官秉耒如無屬員即選擇耆老執青
箱播種耕時用耆老一人牽牛農夫二人扶犁俱
照九卿之例九推九返農夫終畝耕畢各率耆老
農夫行望

闕三跪九叩頭禮其農具俱用赤色牛用黑色箱用

青色所盛籽種悉從各處土宜即著守

壇宇農夫灌溉耨田地方官不時勸課將每年所收
米穀及用過稟盛數目造冊報布政司送戶部查
核至各省耕耨日期每年十月初一日頒時憲書
後交欽天監選擇吉期禮部奏請

欽定通行奉天府府尹直隸各省督撫轉飭所屬同日
舉行永著為令

豐澤園演耕儀

耕耤之前二日

皇帝詣

豐澤園演耕是日禮部尚書順天府府尹各率其屬

穿蟒袍補服於耕所祇候青箱穀種照例陳設

皇帝御龍舟至先詣

時應宮拈香畢至耕所順天府府尹進鞭

皇帝扶犁三推御前大臣侍衛裏事禮畢

皇子諸王學習農事

駕回宮內務府官員終畝

欽定授時通考卷四十九

欽定四庫全書

欽定授時通考卷五十

勸課

本朝重農

御製詩文一

聖祖仁皇帝御製

農桑論

嘗觀王政之本在乎農桑虞舜之命棄曰汝后稷播時

百穀禹之告舜也曰政在養民水火金木土穀惟脩殷之考績羣辟亦曰稼穡匪懈周以農事開基至成王之世制禮作樂典章明備彬彬郁郁然周公所作矇史所歌若豳風七月之篇其道于耜耨趾采桑載績之事反覆不置何前後聖同一指歟蓋農者所以食也桑者所以衣也農事傷則饑之原女紅廢則寒之原小民饑寒迫於身而欲其稱仁慕義有無不競遵路會極其勢不能朕嘗躬行三推以率天下農矣而敦實崇儉之令繩

稼說

朕嘗讀雅頌諸什其時之公卿大夫士罔不盡力於田畝而其東作西成之景至被諸管絃升歌清廟豈非以其事為國之大務耶間考其義若生民之詩茀厥豐草是去稼之害也甫田之詩或耘或耔是雖稼之本也良耜之詩荼蓼朽而黍稷茂是厚稼之生也其詳且盡若此朕軫念農業每巡省畿甸時而春也則觀其播種之函活時而夏也則觀其良苗之懷新時而秋也則觀其穀穗之穎粟堅好用以親民亦因假以自樂非若周成

之於幽風徒得之矇誦而已然竊計其自春而夏而秋
寒暑遞遷嗟我農人其間芟薙之功滋培之力蘊崇之
方棄匪類而殖嘉禾如詩人所云者朝斯夕斯不遑啟
處累閱月而穀乃告登甚矣稼穡之艱習焉而後知之
也雖然世顧有耕而得餒者原其初非不序乃鎔播乃
種而始勤終惰污穢弗治稂莠弗剪苗在草間迄乎秋
期十無一穫豈地土之不宜天時之不善哉咎在害稼
罔辨而養夫稼者未博其功也噫治稼之道可通於治

天下矣

論井田

三代井田之法寓兵於農正易所謂容民蓄衆也自兵農既分勢難復合後世有欲於曠閒之壤倣古行井田之法者不惟無補於民正恐並滋煩擾天下事興一利不如去一弊之為愈增一事不如省一事之為得也

古者田以井授人皆自耕其田故室家殷阜而鮮失業遊食之民後世富室之田跨連阡陌貧民代為耕耨是

以素無蓋藏一遇水旱遂致遊食四方流亡載道亦勢使然也

捕蝗說

嘗讀詩至大田之什曰去其螟螣及其蠹賊無害我田
穉田祖有神秉畀災火則知古人之惡害苗也甚矣註
曰食心曰螟食葉曰螣食根曰蠹食節曰賊昔人又云
此四蟲皆蝗也而實不同故分別釋之且蝗之種類最
易蕃衍故其為災在旬日之間夫水旱固所以害稼或

遇其年禾稼被隴可冀有秋乃蝗且出而為災飛則蔽天散則徧野所至食禾黍苗盡復移斃斃小民何以堪此古人欲弭其災爰有捕蝗之法朕軫念民食宵旰不忘每於歲冬即布令民間令於隴畝之際先掘蝗種蓋是物也除之於遺種之時則易除之於生息之後則難除之於穉弱之時則易除之於長壯之後則難除之於跳躍之時則易除之於飛颺之後則難當冬而預掘蝗種所謂去惡務絕其本也至不能盡除而出土其初未

能遠飛厥名曰蝻是當掘坑舉火以聚而驅之殲之昔
姚崇遣使捕蝗以詩人秉畀炎火之說為証夜中設火
火邊掘坑且焚且瘞蓋祖詩人遺意也又晨興日未出
時露氣沾濡翅溼而不能飛掘坑以驅之尤易為力漢
平帝時詔捕蝗者詣吏以斗石受錢朕區畫於衷務弭
其害每歲命地方官吏督率農夫於冬則掘蝗蝻之種
毋俾遺育於土中或時而為災則叅用古法多方以撲
滅之計其所捕多寡給錢以示勸賞古人有言曰螟蝗

農夫得而殺之為其害稼也以是觀之捕蝗之事由來
舊矣但自古有治人無治法惟視力行何如耳苟奉行
不力雖小災亦大為民患朕故詳指其義為說以示之

祈穀壇頌

有序

嘗觀古之明王必嚴於敬天隆於尊祖誠於養人惟
其敬天故饗帝尊祖故崇配養人故重農而上辛祈
穀厥義備焉蓋陰陽順風雨調災沴不生五穀成熟
斯比戶可封然後寬刑簡賦導以禮樂躋之仁壽苟

陰陽失序風雨不時則五穀傷矣五穀傷而民饑至
矣修粢盛而奏馨聞將何藉焉予肅將禋祀每遇薦
享大典備極誠敬期於孚格蒼穹為羣黎禔福幸海
內穡事浹歲順成即間邁微祲而補助旋施有秋游
至豈非

上天粒我烝民而默佑予一人以無疆之休哉仰戴帝慈莫可名喻聊摠感忱作為頌曰

皇矣

上帝仁覆萬國靡物弗懷鑒於有德古聖聿修昭事建極
元日殷薦爰祈粒食藐躬受命精意以禋大圻體方郊
丘象園屋而大亨典禮均虔外至必主本祖本天巍巍
三聖陟降攸格盡志對越百神其懌曰潔豆籩曰崇圭
璧匪祝一身為民請澤惟

天鑒觀愛我兆人宜夏而夏宜春而春和風應節甘雨司
辰災螟罔作瑞穗含醇豈止郊畿式暨五服昀昀疆理
何土不淑嶷嶷黍稷何產不熟造化靳施伊誰能育啟

芟薙為義二者不廢穎粟可冀歲之歉穰人力是視儻
違其時饑寒或遺閔茲農夫終歲勞瘁在昔有邵嘉種
手藝採入幽歛咏及纖細用銘斯軒庶幾此志

刈麥記

塞外地寒最宜禾黍邇來中外一家版圖萬里朕避暑
山莊歷年已多今百穀齊成與內地相似不過遲十數
日而已故種麥者頗蕃山莊苑內麥穀黍稻皆寓焉從
來稼穡之艱不可不知亦不可虛設朕念切民依痼瘵

一體年近七旬精力漸衰扶杖而閱耕種臨畦而觀刈
穫遇雨暘時若則收割之際蒼顏野老共慶有秋黃口
稚子無愁乏食此朕一時之真樂也五十四年夏六月
小暑乃苑中刈麥之候薦新觀成如雲表盛晨氣暖風
秀漸標竒遠聞各省麥秋相同此目前之實景也孔子
云吾不如老農老圃孟子云從其大體為大人從其小
體為小人農夫足食則樂天下至廣兆民至衆天時之
不齊地脉之不一吾之樂民有食也以目前之實景而

且不能必其盡同又如此嗚呼豈如田野村夫憂樂止
繫於身家而計慮不及於遠大乎故心之勞逸不可同
日而語也夫

春雨賦

神籥絃絢化機和煦元氣上融醲膏下聚首五行者曰
水潤萬物者曰雨于時蒼祇泣節青鳥司晨餘寒未斂
禁火方新風輕颺以習習雲密布而鱗鱗垂九霄之嘉
澍飛四野之甘津始觸石以吐液旋彌空而散澤初曳

جاناں کے لئے دعا ہے

無意普美利於不知植品物以咸若舍細大而莫遺所以解澤旁皇湛恩深厚覆被民生惠鮮隴畝興有淪於三陽敷仙霖於千耦世竝享夫豐亨俗咸登於仁壽洋洋乎造物之弘功予一人乎何有

桑賦

并序

朕巡省浙西桑林被野天下絲縷之供皆在東南而蠶桑之盛惟此一區近在宮中刻為耕織圖每示司牧使知其艱苦今更為賦以託意焉

伊彼條桑其葉始蒨春日載陽綠陰乃披紫陌上兮嫋
嫋綺岸側兮垂垂來璧旭之晨照受光風之午吹影映
帶兮青翰色彷彿兮翠旗既扶疎而相亞復低昂而參
差念蠶事之欲動正芳候之如期聿茲女紅生計是賴
采采盈筐慎加覆蓋虞日煦之少潤防雨頻之為害儻
薄蘆之不繼時憂心之旆旆虔飼食之維勤勞形神於
塵塼摘曉露之輕滋乘良月之新薈望千畝之間間實
蠶家之弘賚誠黼黻之必資繫袞職之用大其重等於

苗稼為王政之不外予恒恐其難知作深宮之圖繪至
夫厥貢著於尚書沃若詠於篇什公室見說於禮經牆
下屢申於孟集試古訓之歷稽又民務之應急若乃訝
為神木騁以青華末照是晞甘樾如瓜馴雉表異黃鳥
稱嘉雖景物之堪娛咸無關於大家夫其詫幢幢之高
蓋美亭亭之奇樹靈根依倚於十洲巨跡遂闢於周宇
類齊諧之荒唐皆予今日之所不取也聊因清晏簡牘
是書用示遠邇是溉是鋤共知愛護種繞其廬蠶桑農

穡安寶璠璵

時巡近郊憫農事有作

芳郊景物麗淑氣扇暮春靈雨應良節光風薄嘉辰省
耕已屆候夙駕方來巡前驅列式道羽衛羅勾陳時有
田間子荷耒披車塵譏訶勿頻數疾苦當咨詢千耦幸
終畝二鬴猶懸困襁褓爾勤動痼瘕予隱親賙賜出泉
府拊循屬官臣行潦有挹器列井無枯津所惠良未徧
嗷嗷愧斯人

夏旱步禱

南郊喜雨

歷春憫農勞首夏望嘉穀離畢月故遲密雲去何速
願穹闕膏澤及此祈年夙齋居承穆清中夜起自肅
繁星麗赤霄雲漢光自煜雞鳴開重閨輿馬輟華轂
步禱升郊壇祠官啓太祝是時甘澍零霑潤及拜伏
空濛迫闔闔噴薄驅海瀆屏翳灑道迴滲漉足裳服
麥隴應秀色重穎欲在目願惟歌屢豐餘粟棲比屋

秋日出郊觀稼

秋色日寥迴萬象皆蒼蒼
朝曦被渥露草木含晶光
西成方屆候農事將築場
於焉省斂獲令典重百王
輕軒屏前置夙駕無嚴裝
郊原一以眺煙樹紛成行
微風散深樾清流抱迴塘
土脉秀且沃簞車鬱相望
新鑪粲如月刈此溪雲黃
捃拾復何幸遺秉滿道旁
鳥雀互翔集婦子咸悅康
行將吹葦籥報爾千斯箱
眷言三時勤艱難詎可忘
茫茫視九壤豈盡歌豐穰
二鬴苟不充予饑

怒如傷幸茲樂有年時若雨與暘勗哉慎所麗田功庶
無荒

喜雨詩十六韻

并序

朕撫御天下每以民生為念夙興夜寐無時少懈也
歲在丁卯自春涉夏蘊隆少雨日更增甚麥秋期至
農事堪憂傳曰龍見而雩謂建巳之月萬物始盛待
雨於天今當雨不雨或人事之未修朕躬之有過歟
亟命重臣凡國計憂戚刑名錢穀但有關於民者再

三講究有言在京臣工鑄級過多皆賜復還可以致
雨以及戲館秧歌之細事無不曲盡議論迄於五月
憂心如焚減膳撤樂端居省過將以明詔布告天下
思所以挽回天意詔下旬有餘日或膚雲方集輒阻
燥風或微霖纔施旋升杲日昔人遇災而懼側身脩
行欲銷去之况茲不雨乎朕以涼德臨億兆之上為
民之誠天日可鑒欲躬詣郊壇致祭諸臣亦以為請
因命禮官諏吉具儀齋戒肅穆步禱

上帝始齋之晚密雨濡潤祭之日雷雨交作自茲間日而雨徧四郊田野霑足朕先憂而飲食俱廢者為民也既雨之後喜而舉手加額者亦為民也今天不遺斯民禱而賜之雨使得不愧三公九卿之請朕之幸矣故賦喜雨詩以抒其懷

體國為民事憂勤固在斯驕陽春既盛膏澤夏愆期省刑書每下請雨令頻施雲未油然作風偏颯爾吹芄芄苗欲槁細細草將萎翹首瞻青漢焦心對赤墀園扉重

舉滯旃厦幾疇咨齋祭祀神鑒精誠只已知誰云天最
遠於是聽能卑默處敬居日恭虔步禱時微衷慙上格
大化喜潛移霽霈滋南畝飄灑徧九達變黷陰陽協滂
沱渥澤垂田家還自樂朝野共吟詩從此煩襟滌由來
百志熙願同茲砥礪參贊奉無私

蠲江南逋賦

并序

江南屢年逋賦二百二十餘萬逐歲帶征聞吏民頗
以為累朕志存約已弘澣衣菲食之風事期裕民師

挹彼注茲之義特頒詔令悉與蠲除

國家財賦東南重已責蠲租志念殷膏澤何妨頻見渥
普天願與樂耕耘

憂旱憶民事作

仲夏炎曛盛德涼時未和驕陽因六事亢旱最三河

三河

為天下之中

民以食為重天將風更多憂勤難暇顧惟誦憫

農歌

菜畦

東南農事已春深
菜隴花開滿地金
獨愛小民勤力作
馬頭堪慰省方心

桑林乍綠蠶事方興詩以嘉之

彌望桑林吐葉垂
枝嫩碧初勻竹舍正殷蠶務天工雨
露維均

暢春園觀稻時七月十一日也

七月紫芒五里香
近園遺種祝禎祥
炎方塞北皆稱瑞
稼穡天工樂歲穰

靜明園喜雨

西山初夏玉泉清
暮雨隨風滿鳳城
四野皆霑比屋慶
八荒盡望樂豐盈

岸側桑葉初碧

夾岸青青遶御舟
濃桑初茁滿村謳
省方便問蠶家苦
春雨連綿盡日憂

麥秋盈野志喜

有序

歲次癸未夏至有事於方澤齋戒自暢春園進宮見

麥氣盈秋田園茂盛雨暘得時稼穡有望從來北方
雨澤豔陽清和之際每每難得皆因去冬陰雪連綿
自春至夏未欠甘霖所以草木花果罔不豐榮人心
穀價罔不和平故志喜而為詠

去冬盈尺雪占年今夏脩脩麥隴全萬畝皆齊誕降穀
千家秀實已登阡先憂暘雨惟民疾後樂時豐紀玉牋
志喜雕蟲晚學愧薰風南至影花甌

康熙四十二年夏秋間恒雨為菑山左尤甚朕夙

夜靡寧宵旰焦勞減膳撤樂坐不安席自冬至
夏自夏至秋未嘗晷刻少安雖設法拯救幾乎
難保幸四十三年二麥大熟秋成頗佳饑者未
轉溝壑窮者皆得衣食實非朕之涼德所感賴
上天之所鑒祐也故喜而不寐作長歌以示

璇璣玉衡齊七政祇懼敏德天眷命百志惟熙
亮天工六府三事須主敬天地無私本至公
人事有違失五正水旱從來不可測全賴有司
勉安定癸未夏秋恒雨頻

二麥秋禾皆沒淪州縣無策萬姓逃父子流離呼蒼昊
奏書紛紛連早夜手書的的察憂貧蠲賦蠲賑詔數下
民食維艱豈不詢截漕施惠恐不及遣官分養誠沾均
人力雖盡惟時難唯天至仁不絕食甲申春夏風雨調
麥隴翛翛衆喘息夏苗徧野雙穗多與情頗解去菜色
山左編氓間且樂畿南黎庶喜而康從此休息須謹慎
防災備患豈有傷閑邪存誠勉官吏清廩奉職守封疆
民脂民膏供爾祿痛癢莫知悞籌量宗子家相同胞義

勿使叢勝述職方

五月上旬避暑熱河塗中喜麥秋盈野雨暘得時

賦七言一律

畏暑乘輿出鳳城
麥秋預卜望庚晴
千村共飽連年稔
萬井同歡比屋盈
谷有靈泉山脈壯
道無峻嶺馬蹄輕
移風易俗先忠孝
蕃息編氓在厚生

舟中觀耕種

四野春耕阡陌安
徐牽密纜望河干
土肥原係黃沙過

永定河泛濫之際遍地黃
水自治河之後得以耕種
辛苦先年挽異瀾

五十五年正月十二癸卯立春是日風從東北而
至景雲密布瑞雪鋪地至十三日未止書云立
春與元日同占乃收成之兆故喜民有足食之
慶朕慰宵旰之憂賦五言排律以紀其事

問夜何嘗歇殷勤六十年歲華催短鬢寸晷惜擔肩豐
歉無推數平成在事先人安為國瑞穀熟是民天慚撫
陶甄治思將法令蠲雲濃春氣早風靜漏聲傳南陌銀

花徧東郊繡壤連管絃喧里巷燈火接山川不為私情
擾寧耽寶饌延祇期民俗厚敢詡治功全禮讓傳家教
詩書戒往愆翠煙籠畎畝泛泛潤桑田

去歲三冬有雪至三月間農忙之際二十七日夜
雨竟夕喜而成詠

滋麥如酥雨空濛入土膏心同黎庶苦目盼紫壇高任
器已知重安人寧避勞春愁暫且釋點點付揮毫

賦得隴麥

節遲穀雨後田麥始分畦已送花開盡難將春事稽純
陽時序近餘潤化成齊未卜陰晴適先期輯庶黎

小滿後偶旱塗中祈雨四月二十三日甘霖大霑
夙夜愁懷春夏間天時難信未怡顏平原晚麥纖莖槁
四野新禾旱色殷乍起雲光連嶺岫先垂雨脚遍人寰
共沾甘澍敷膏澤民食方知稼穡艱

題新安道上

滿目平川映遠空身形少健一衰翁社前荷鍤爭春暖

隴畔扶犁趁晚風，雨澤深邀天地德。
耕桑還賴穡人功，京南每出同村叟。
總得陽和一氣中。

久旱無雨夙夜徬徨夏至前方得普霑

喜雨雖云快，豈無久旱由望雲待旦起問夜數更愁霹

靂偏稽候

雷遲小滿後方有聲

風霾任作尤西成登穀後方慰憫

農憂

豐登者朕之獲福歟收者朕之失政出此入彼不

能自恕故作近體一律

喜雨人同我不然，
鰓鰓宵旰待豐年。
千村時若千村慶，
一日恒暘一日愆。
率土盈寧難並得，
普天恩澤豈兼全。
先憂後樂何能遂，
衰景殘齡祇自憐。

京中報到霖雨普霑

亢陽愁久旱，霖雨滿溝渠。
倏忽枯枝潤，須臾卷葉舒。
千村勤襪襖，萬頃促犁鋤。
企望收成後，欣看穀賤書。

世宗憲皇帝御製

孟秋扈

蹕觀稼恭紀

殿角微涼起幽歌大火流蓮房新墜粉梧葉早驚秋玉
露滋芳甸金風入畫樓

聖心勤稼穡躬自省西疇

田家即事二首

沙磧高低禾黍盈羣飛銅雀繞田鳴竹弓蒿矢堪驅嚇
漫向黃雲試射聲

其二

戍烽罷舉息征塵肆力耕耘屬幸民榆柳陰疎秋社近
綠邊笳鼓賽田神

扈

駕觀麥

雨潤郊原奉豫遊勤民

御輦向西疇搖空翠浪沄沄起覆隴黃雲冉冉浮三白降
穰占歲稔兩岐擢秀應農謳佇看比屋連耒動擊壤聲
中麥有秋

田家四時詞 六言

春

陌頭楊柳初放溪上桃花欲燃處處青鳩呼雨家家黃
犢耕煙牧童羣嬉挑菜餉婦自解撐船借問浪遊城市
何如樂業村田

夏

帶露葉盈蠶箔翻雲麥熟田家白水千塍秧馬綠陰幾
戶綠車日午鳴蟬遠近風薰飛燕橫斜男女適均勞逸

相逢只說桑麻

秋

風露微涼天氣四鄉一派秋光
蕎吐東阡雪白禾香南畝雲黃
青刈園蔬足雨紅收林實經霜
舉室欣逢樂歲商量築圃登場

冬

靄靄炊煙茆舍霏霏臘雪柴門
闌靜閒眠羔犢籬牢安穩雞豚
夜織梭鳴啞軋朝春杵韻喧繁
賽社爭撾祭鼓

歌呼新釀盈盆

耕

茅屋踈籬翠蔓牽繞籬桑柘翳平田村中斑白閒無事
隴上青黃喜有年比戶機梭鳴月下一家兒女聚燈前
那能更羨公侯貴蟹美魚肥稻熟天

耕織軒

軒亭開面面原隰對昀昀禾稼迎窗綠桑麻宰地新簷
星窺織火渠水界田畛辛苦農蠶事歌詩可繫豳

菜圃

鑿地新開圃因川曲引泉碧畦一雨過青壤百蔬妍潔
愛沾晨露鮮宜潤晚煙倚亭閒佇覽生意用忻然

耕藉

農事惟邦本先民履畝東翠華臨廣陌綵輶駕春風禮
備明神格年期率土豐勸耕時厘慮敢為惜勞躬

三月三日得雨

三春淑氣動萌茲膏雨知時四野皆東作共看霑溉足

西成咸慶歲時諧柔桑陌上青含秀穉麥田間綠正佳
佇覽霏霏飄灑意眷予兆庶少抒懷

耕藉詩

有序

禮天子為藉千畝躬秉耒以耕所以敬祀典重農功
示先民也稽之月令每歲孟春古帝王實從事焉我
聖祖冲齡踐祚越十一載壬子始行耕藉禮夫藉以敬
天重農而

聖祖在位六十餘年宵旰憂勤靡時或釋凡立心行政蓋

無刻而非寅畏昭事之誠無事而非勞民勸相之實
也是以家給人足時和年豐而成長治久安之天下
朕繼統之次年甲辰春既率屬僚躬耜南郊今歲乙
巳復舉行焉是日也靈雨既零春陽初霽履我阡陌
秉耒耜三推禮成兆庶歡洽傳曰先之勞之又曰
無倦斯典也朕非欲為一時之盛觀亦非欲博千載
之美名況大典非炫耳目之具而飾名之事又朕素
所弗為惟是祇承

聖祖重農家法率吾民敦崇本務而與臣工敬勤無倦以庶幾康阜之成俗也并紀以詩

蒼馭千官引乘時事耜田從來重稼穡何敢惜勞先履畝迎膏發羣公繼耦聯所祈同億兆歲歲介豐年

耕耜

無逸農功重豳風耜事先方春勤夙駕乘令為親田夾隴千官肅扶犁百辟聯禮成終畝後父老慶豐年

喜雪

夙夜期瓊屑三冬日見晴省修求直諫祈禱秉精誠瑞
雪春時降彤庭喜氣盈

蒼旻仁愛普億兆荷生成

朕因去冬未雪憂懷莫釋夙夜竭誠祈禱於驚蟄

後二日荷蒙

上天鑒佑春雪下降朝野同歡因成一律用誌欣慶

霽霖愆期憂歲儉臨軒愁詠憫農歌三冬望雪心如渴
此日飛霙氣始和

蒼昊垂慈施愷澤黔黎有幸沐恩波遙思九土應同慶積
素凝華知幾多

多稼軒勸農詩

夜來新雨過畿甸綠平鋪克盡農桑力方無饑凍虞蠹
筐攜織婦麥飯飽田夫坐對春光晚催耕聽鳥呼

欽定授時通考卷五十

欽定四庫全書

欽定授時通考卷五十一

勸課

本朝重農

御製詩丈二

皇上御製

豐澤園記

西苑宮室皆因元明舊址惟豐澤園為康熙間新建之

所自勤政殿西行過小屋數間蓋

皇祖養蠶處也復西行歷稻畦數畝折而北則為豐澤園
園內殿宇制度惟朴不尚華麗園後種桑數十株聞之
老監云

皇祖萬幾餘暇則於此勸課農桑或

親御耒耜逮我

皇父纘承丕業敬

天法

祖世德作求數年以來屢行

親耕之禮皆預演禮於此乃知

聖聖同規敦本重農用躋天下於熙皞之盛若瀛臺之建
於有明飛閣丹樓輝煌金碧較之此園固為美觀而極
土木之功無益於國計民生識者鄙之行一事而合於
天心建一園而洽於民情身率先而天下丕變吾於是
乎知

皇祖

皇父之為首出之聖也

田字房記

流杯亭之西南有田字房焉丁未四月十八日

皇父萬幾之暇燕接親藩遊豫於此是地也西山遠帶碧
沼前流每當盛夏開窗則四面風至不復知暑其北則
稻田數畝嘉禾生香藹聞於室蓋我

皇父重農之心雖於燕閒遊觀之所亦未嘗頃刻忘也古
昔聖王臨朝視政之暇必有怡情娛覽之地故靈臺之

詩美文王也卷阿之詩頌成王也今田字房所以命意
重農者豈徒怡情娛覽已哉至若黛掃山顛風來蘋末
麥畦浪起柳岸煙開馴鶴從容而起舞丈鴛匹偶而泳
遊蝶裁五色之文蜂喧萬花之谷物華景麗則思飲和
食德熙穰於光天化日之下而怡然以樂其或涼颼四
起鴻雁來賓白露如珠綠雲改赤千家之砧杵遙聞百
室之倉箱盡實則思遺秉滯穗誰遺寡婦之利而悄然
以憂時引儒臣坐而論道或率諸王公子弟修家人之

禮講燕好之歡所觸目而會心者我

皇父之同憂同樂憩息於斯較之靈臺卷阿意更深長矣
謹為之記

時應宮記

夫天一生水坎精發祥凝靈聚液流為江海江海乃天
地間物之最鉅者也江海之有神自三代漢唐以來莫
不祠祀惟謹有宋大觀四年詔天下五龍神並封王爵
龍神之尊自是始厥後春秋犧牲之祀代有常典

皇清受

天命禋祀

上帝

后土懷柔百神江淮河濟五岳四瀆之祀載在太常犧幣
之數俎豆之器既豐既隆神歆以格雍正二年天子以
為龍神之位既尊宜特修宮觀以致虔禱乃於西苑內
豐澤園北建時應宮所以致誠明神俾雨暘時若稼穡
以成者也夏六月霖雨彌旬幾至於勞

皇父步行往禱其日即晴又明年黃河清百餘里此非神人効靈河海清宴之明驗乎夫以

天子精誠通於神明以之事

天饗

帝罔不昭格而況於龍神乎信哉誠之能感物也是為記

耕藉賦

并序

皇上御宇之五年青帝司方之二月春風普扇陽德方亨天子乃耕於千畝之田禮也臣聞聖王務本耕藉以勸農

功明主孝親親推以供祀事我

皇上孝以事

親勤以率民二載甲辰既耕加一茲又

躬行耕藉之禮急染盛重民食致誠匪懈其典則隆洪惟
我

皇上道洽天人化霑草木誕敷文德廣運聖謨渥澤周於
羣生至治昭乎天壤乃猶頻興重農之典時勤保介
之咨追厥唐虞播種之踪為彼率土民人之勸萬衆

觀儀上農終畝迨厥秋成登於天廩薦之

皇天供於

祖考

臣知

皇天

祖考鑒

皇上之精誠歆

皇上之大孝必錫嘏降祉永保無疆明德惟馨聿懷多福

臣不勝踴躍懼忭之至謹拜手稽首而獻賦曰

繫惟重華之命稷兮播穀實繼乎禹功必烝民之粒食
兮始風動而時雍親耕肇於姬籍兮意往聖之皆同我
大君之首出兮屢三推以勸農豈玉食之是享兮惟簋簋
之虔供

秉耒耜以率先兮符澤物之元功於是春陽初布青帝司
方嘉萬物之昭蘇值千卉之勾萌農祥既見土脈方昌
協風應律陽氣滋彰

皇帝乃順月令撫嘉辰念民力飭甸人當前期而致敬用

有事於青春於焉載師清畿封人淨路常伯獻儀掌舍
設桓爾乃青壇蔚其聳立華華森其崔巍雲移翠幕柳
拂青幃啟千畦之平壤欣四塗之腴肥逮夫元辰既屆
曉色方鮮

天子則御藻冕佩蒼瑱被龍袞鳴和鸞載青旗揚朱旂接
游車之鱗鱗施梁輶之芟芟爾乃稷宮將近樂具班陳
天子乃降御輦饗農神祈嘉穀焚燎薪禮成而退有事藉
田衣被襚褻趾履陌阡王侯衛後虎賁導前太僕秉轡

牽牛奉鞭乃歷廣場撫御耜執縻手底不辭瘁乎三推
載耒御間試躬親乎千畝王公卿貳或五或九白叟黃
童歌呼奔走維誠敬之聿昭知樂愷之孔厚於是黛耜
方輟紺轅遂旋雨廡纖以灑潤風縹緲而淨天侍從偕
來睹

天顏之有喜馨香上達卜慶兆於豐年夫元鳳下親耕之
詔永平垂開耜之篇魏主望公田而發趾晉帝帥羣后
以祀先尚傳為古今之盛事並書之史冊而爛然況乎

我

皇至仁大知既事治而府修亦成天而平地修稼穡以勤
民謹神倉而歲事所無逸以知艱重明粢而將祭三春
暖兮播百穀四野寧兮進雙穗也哉乃為之歌曰田之
興兮稷之功澤萬物兮助鴻濛我

皇展事兮千耦其同和協天人兮一哉

皇衷既耕既耨兮我稼其豐爰播爰植兮麻麥幪幪又歌

曰思樂畝畿千頃其耦

鸞輅載臨

躬耕其畝登於秋廩斯箱斯倉薦之

宗廟供之明堂神之格思綏祉無疆

一人有慶永奠萬邦

喜雨賦

客有駕輜軒乘雲輅展軫於南畝縱轡於東郊遨遊容
與徘徊逍遙爾乃白雲起乎空谷甘霖降於崇朝震雷
燿燿飛電爍爍乃往田舍而息焉有二三人逡巡而

前曰斯雨之降時則時矣膏澤之濡普而施矣抑誰之
功乎請吾子明言以告之客奮袂而起曰猗歟休哉盛
世之民也飲其德而不知其力坐吾明語子方今龍飛
九五聖人在位德配乾坤功參天地精誠通於神明政
教化乎萬類故上天眷命俾雨暘時若而萬方以治乃
致舍哺鼓腹耕田鑿井者實不知帝力之賜也老人曰
聖人之德某既知之矣請吾子賦雨之澤及蒼生者可
乎客曰若夫金烏收景層陰蔽空雷殷殷以振響電灼

灼以搖紅鼓河伯之驚濤涌海若之幽宮瀉天池之巨
浸走萬里之長虹遠迷三島近失三峰迴生意於衆卉
消渴望於三農此則雨之方作而其勢最雄也乃其雲
開雨止霽景澄鮮山宛宛其染翠木蓊蓊其逞妍鳥嚶
嚶其鳴樹草芊芊其含烟柳暗歸鴉簷喧乾鵲槐影濃
兮庭宇清花陰轉兮簾櫳薄纖歌動兮高樓紅袖飄兮
綺閣緗帙開兮芸編博山焚兮繡幕莫不欣膏澤之滂
澍喜雷聲之頻落此又雨之既足而萬方共樂者也至

若烏犍耕白水之涯黔黎藝綠野之畝白叟歡呼黃童
奔走土脉既滋兮禾黍如雲灌溉不勞兮田疇以阜爾
倉廩京爾荷爾負此又二三子所終日服事而知利我
之孔厚也於是老人倚杖而歌曰雨玉不可食兮曷若
嘉苗滿目屯黃雲雨金不可衣兮曷若五風十雨利耕
耘惟天降康兮稽首蒼旻惟皇感天兮永眷日勤千秋
萬歲兮樂吾之君

條桑賦

伊春陽之晼晼兮布始和於東風百昌欣其向榮兮女
夷協氣乎昭融柳冉冉其含綠兮桃夭夭其暈紅尋綺
陌而云邁兮採條桑其始豐則有長腰健婦黃髮奚兒
攜彼筠籠兮遵微行而纍纍持此斧斤兮步遙術其遲
遲蔚蓂龍而豐茂兮邈洪榮而歲蕤挺脩綠其端直兮
上扶疎而參差韻條風之無聲兮葉芳青而紛披浥朝
露以流潤兮枝遠揚而下垂於是既採既捋載筐載籃
留長條之猗猗取綠葉之纖纖午靜茅簷兮列分行之

圓蓬春長部屋兮餽八蠱之新蠶故曰農莫苦兮農功
女莫勞兮女紅歷歲以月自春徂冬彼膏粱而錦繡者
宜思憂樂之異同

稼穡惟寶賦

天之鍾異物也石韞玉而山輝蚌含珠而川媚金在沙
而待披綃織鮫而成瑞火齊共木難而交朗都梁與五
木而爭貴繡毳紅毼赤羽文翠固海舶之誇珍亦大賈
之網利者也然而饑不可食寒豈能衣惟土物之是愛

乃民命之所依希代之姿莫匹連城之價在茲此聖世
之至寶羌歌咏於周詩爾其既耕既耘既方既皂沃時
雨而霑濡熟西風而堅好珠顆滿車兮無慙照乘之光
玉粒盈倉兮絕勝瓊瑤之報故珍重上厯乎一人而滋
培全仰乎大造為植物之獨貴豈異賄之足稱勤耒耜
而莫怠謹播植而乃成爰藉亞旅之衆如施追琢之精
力作三時兮類藍田之種玉有秋不日兮誇赤水之求
珍冀千倉與萬箱兮寧必不貪為寶慶崇墉與比櫛兮

懸知有道則生信饑寒之可禦陋瓊瑰之為輕不假居
奇以市何須韞匱而藏餘滯穗兮伊寡婦之利匪異物
兮實餽貧之糧故曰寶金玉者心勞而鮮並寶稼穡者
心逸而獲臧其為利也最薄其為物也孔良尚計九年
之蓄以期兆姓之康

多稼如雲賦

出郊原而縱目愛金秋之氣清草霏霏而露濕天寥寥
而風生寒蟬收響陰蟲載鳴繡錯溝塍乍青連而散漫

次定四軍金書

乃錢鏐築我場圃以樂農夫以御田祖豐滋漫若且聞
束皙之詩悅茂油然欣聽籥章之鼓方苞既實慶高廩
於茨梁堅好不秕喜盈疇之稷黍故曰穀為君寶惟農
是親遺秉盈場玉食亦登其芬潔餘糧棲畝金枝轉掩
其輪囷豈非聖德之格天而多稼乃得以如雲乎

麥秋賦

繫鶉火之司令疑商金之屆期影度朱明始散芳於榴
圃律侵白帝獨抽穗於麥畦愛芄芄之連纈亦離離之

下垂南畝正勤於此日西成偏紀乎茲時披梅風而含
穎潤穀雨而雙歧是蓋四時之代序而萬物各遂其繁
滋者也乃其堤上鶯啼隴間雉雊芳草未歇而猶霏綠
樹成陰而始就何鉅父之奄觀兮當隆曦之永晝睹黃
雲之滿野兮驚白藏之應候溽寒露而朝濡兮潛陰呂
而夕秀雜收斂於長養兮參結實於紛茂炎當令碩
碩成行紫莖兮韞爽青穗兮含涼大有占而豐登肇象
兮中和順而隴畝飛香對銀縹而偶穗兮散珠穎而分

芒豈非化工之獨運而為盛世之嘉祥哉

嘉禾頌

有猗者禾在彼中田
爾農來思越陌度阡
芟之奕奕柞之澤澤
五穀既播三時無失
載甲載圻載長載褒
載穰載實載碩載茂

帝寶顧矣稷實助矣
風披獲矣雨灌注矣
綏我屢豐言呈其瑞
休我

皇風言多其穗遠自
滇南近兆

帝藉匪雙伊九匪寸伊尺先民有言食為民天百穀用成
自古有年

瑞繭頌

帝念民依惟農與桑孰飢莫食孰寒莫裳雕鏤必黜爰勤
三農纂組是省用紓女工

昊天維顯聿降瑞繭瑞繭維何萬蠶同簇曾不經緯曾不
杼柚苑窳致力西陵效勤神功默相嘉繭乃成繭純繭
素匪紅匪紫繭質繭實匪錦匪綺言徵其應言發其祥

祐此蒸民成以報章太平之澤五十衣帛夏清冬溫太
和充溢

蠲租樂擬樂府

勾芒布令土脉濡荷犁早向東阡趨男耕婦織間時無
料理粟帛供正需食毛敢辭王稅乎春回郅屋大澤敷
小吏勞午捱門呼竊疑督賦驚農夫却宣王命傳蠲租
傳蠲租蠲租樂新絲繅後新穀登換取金錢娛老弱

觀穫

秋聲入園林涼風動高閣偶出步郊垌斜陽照墟落眊
彼隴畝間黃雲堆漠漠錢鏹已早庠銍艾聲參錯畦東
與畦西是處竟秋穫手刈賽疾遲背負爭強弱遺秉與
滯穗寡婦亦云樂吾聞四民中惟農苦莫若有年穀價
低歟年委溝壑即今豐稔收租重主人索益信為政者
仁民最先著

郊園見西成有象即事志喜

去冬雪盈尺占之利東作今春雨如膏可卜豐登樂一

自入夏來雲漢光煜爚崇朝歇甘霖祝融扇炎灼

聖皇念民艱憂勤倍諮度對越保無斁

昊天鑒誠恪未幾三日雨霑濡徧村落庭除景色佳苔痕
茂參錯那知郭外田良苗助長若承

恩獵南苑平野秋風涼氣爽馬蹄輕天高鷹眼矍合圍出
紅門更覺郊原廓行行歷野店去去穿林薄中林施兔
豨歇驕奮噬搏田事亦云畢農夫罷秋穫眄彼場圃間
黃雲堆漠漠婦子利秉穗老幼飽藜藿從識天人理應

響如鳴鶴宵旰

聖人心頓起下民瘼太平徵有象永言誌其畧

望雪行

今年三冬未見雪同雲若被風吹散夜觀望舒如鏡明
曉看翔陽似冰潔秋麥全資冬雪培遙識農家望歲切
我聞三白兆豐年望霰先集心如結上帝穹窿坐玉京
青女滕六分行列如何不一駕雲車試剪飛瓊噴玉屑
飄飄灑灑頃刻間利我三農都喜悅

催耕鳥

條風天宇布百昌欣韶熙村原趣已佳綠水明千畦東
耒耕南畝提壺餉東菑郭公何丁寧催耕田畔啼高樓
嫩柳梢低喚柔桑枝分明為一言東作當及時田老聞
之喜胼胝非所辭田婦聞之喜饋饁職所司但願歲豐
穰辛苦甘共之幾度聞此聲蚤起竭力為那似香閨中
驚眠翻怪伊

春蔬

春融地氣如膏滑一畦烟甲隨雷發檐前小鳥喚春眠
袞露攜籃勤采掇早韭初菰紛列盤清芬細嚼冰齒寒
淡泊有味取次領旦晚為爾還加餐君不見一食千金
丞相府猶說區區難下箸

有鳥

有鳥有鳥名布穀高喚枝頭村柳綠村老聞聲急荷鋤
趁時耕作還相勸東隣西舍催耕遍喉吻苦乾飲水曲
不似籠中雙畫眉巧言但博主人肉

有鳥有鳥枝上啼啼聲風送到深閨聲聲催織當春日
織女聽罷顰雙眉飽蠶方作繭那易成新絲新絲還要
賣匹帛安可期我願拖綾曳錦者常念茆簷忍凍時

觀刈麥

麥苗入夏結穗黃東隴西隴碩且長老農此日走田忙
腰鎌遍割樂歲穰笑看黃雲各成片密莖隨手行行亂
肩挑背負曬檐頭餽粥有餘他不羨呼兒莫逐飛來雀
令渠亦識收成樂

所見

東皇迴星輶和氣遍六宇應候百昌蘇
默默春風鼓皇州景物饒廣麗洵天府
臨風跨紫騮緩轡過郊墅壟上事春耕
停馬問田父小立汗不乾向我情畢吐
去年冬不雪今年春未雨野老望雲心
此意良辛苦清晨負鋤出努力向日午
畝耕次第完下苗何日舉我聞田父言
仰望默不語天心本仁愛自有元功補
甘霖應在即如膏潤沃土佇俟西成時
萬戶倉箱貯

灌麥

大麥五寸長小麥三寸半地乾苗欲枯離披隴畝畔猶
幸灌溉便近傍河之岸清晨課僮僕輓轆轉雙腕初看
土溼溼漸覺流漫漫須臾苗盡起生意良可玩爾僕聽
我言莫怨體流汗不見萬頃田農夫徧澆灌

灌園

種樹圍小園種菜數畝餘綠畦足野趣且復得嘉蔬春
風千頃浪秋雨一犂鋤四時供盤餐青青藿與茹今朝

柳陰下課僮轉轆轤吸彼井華水灌我珠玉畚芳坂潤
新綠勃然生意舒自饒塵外味何必山中居

春蠶食葉聲

吳天三月春光蕩吳蠶三眠蠶更長陌上新桑葉葉抽
晴窗鎮日風雨響喚起深閨未畫眉攜筐急就飼朝饑
流水潺潺箔間落爽簾瑟瑟簾前吹日長莫厭耳根聞
蠶飽絲多足相報但願今年官絹輸却免門前租吏到

秧馬

清和四月新秧綠一壠分來千壠足
桐馬平馳碧浪輕
鬚鬣森森稻苗東北人使馬南人船
兩蹄踏破橫塘烟
畦東畦西來往速
揀罷儂家幾頃田
戰戰青針波欲沒
載驅終日何曾歇
草壁高懸睡老農
好與吳牛同喘月

五日芒種

南風薰薰麥苗綠
稻鉞出水如新浴
五日天中節物佳
却逢芒種農功促
平湖潏潏欲生煙
角黍蒲尊雜管絃
老農負背溪田裏
那得閒從競渡船
暮歸偶自街頭走

買得靈符貼門首但願神貺沛曼陀指日西成看大有
村賽曲

老巫伐鼓聲瑟瑟冬醅初熟霜柑紅合家羅拜致虔恭
村村樂事傳幽風黍稷堆西稻堆東倉箱萬億快年豐
謝神默佑恩何窮賽罷福酒先酬翁老巫牽羊別家去
來年大有神應助

插秧吟

池田漠漠薰風起插秧時節江村美茅屋家家晝掩門

一畦新穎浮清水兒騎秧馬學插秧壯者手疾力獨強
老翁背直難偃杖藜督課溝塍旁晚來共浴前溪曲
幾堆雲脚出山谷但願知時甘雨霏管取今年衣食足

種豆

清水曲彎環隙地餘數畝欲觀生意佳種豆雨晴後我
適杖策來試以問園叟開田良不易治畦亦勞否老圃
荅我言似此亦何有不見萬頃田種自吾儕手赫日雜
炎風荷鋤忙奔走歛年晏溝壑豐歲纔餬口我聞老圃

言飲翁以醇酒願告朱門者農勞不可負

古風

暮出城東門見彼耘田者偃僂畦壠間紅日正西下揮汗立片時薰風散平野指日卜西成籌車賽秋社還憂租稅重催迫不相假終歲事辛勤農夫獲利寡

觀
刈

秋露零場圃金風氣蕭索百穀已告成呼童庖錢鏹為地只盈畝頗可驗耕鑿屆茲西成候策杖課收穫轉憶

東作時雨暘卜時若入夏秀以實日中驅鳥雀念此終
歲勤亦得一朝樂園林喜空明爽氣侵簾箔撫景獨吟
哦允矣興所託

恭和

御製三月三日得雨原韻

知時甘雨動春荂潤物流膏澤孔皆綠野空濛生意滿
平疇霖霖兆情諧豐亨景象占多慶晚晚風光喜更佳
自是

天心眷至治嘉祥允慰

一人懷

上幸豐澤園演耕耜禮擬應制十韻

大地陽和淑景韶
潛蘇土脉應風條
洪鈞普扇百昌序
大造均舒萬物調

率輦臨耕旗閃爍

金輿載駕玉鏤雕
行行西苑停鑾輅
泛泛天池盪書橈

帝耒四推膏壤沃

皇躬一墫甫田遙先期已見寅恭懋終畝還思教澤饒種
布期生連理穗墪開願長九岐苗追思

聖祖觀耕地却值吾

皇演禮朝豐稔歲功九有遍太和景象萬方昭放勲久頌
堯功茂協帝重瞻

舜德超

賦得卧聽村村打麥聲

夏雨初過已有秋黃雲片片擁來牢暖畦錢刈青莖亂

晴圃耜翻紫穗稠
舍隔西東聲拍拍
戶饒餅餌樂油油
高齋亦識豐年景
夢蝶窗頭酒一甌

雉母呼雛隔野塘
北窗初啟學義皇
田間錦疊千重縐
壠上濤翻四月涼
塲圃地喧耜板響
隣家風送午炊香
從容鼓腹堯天裏
為愧農人鎮日忙

雍正九年六月

上以近畿三省雨澤愆期
豫籌賑恤之策
甘霖疊沛恭紀
十二韻志喜

帝念民衣食端惟農與桑粒民符后稷熙績法陶唐乾惕
通朝夕中和善弛張朱明三夏永甘雨萬民望

睿慮周三省

宸衷達九蒼普天頒惠澤特地厘諮商精禱思無逸殷憂
問未央貯倉施舊積轉漕截新航更降停徵

詔仍頒捐賦章

恩綸過所望膏澤應非常對越何昭爽誠通自溥將從知
天佑

聖萬國慶豐穰

秋日播麥新生

釐牟遍壠拂參差正是西風八月時
翠毯乍抽新穎細綠波輕泛早苗披
芊芊不畏秋陽暴靡靡長霑白露滋
此日種成來歲獲化工四氣為全施

辛亥秋九月出南苑行園以穡事未竣不果獵而
還

翻雲板鼓塲圃錢利霜刀刈大田一幅
豳風圖畫似

肯教獵騎悞民天

霜後平原地已堅青驄不用錦連錢相逢野老扶兒笑
今歲豐收倍往年

東作

東作三春始滋生萬物稠公田平似掌新水綠如油蟲
捲柔桑葉針抽嫩穎頭乘時功力備多稼定今秋

賦得好雨知時節

漠漠春雲布濛濛時雨飛點空方霽霖入夜轉霏微正

助資生德從知造化機東郊明曉步坂上麥苗肥

村墟夜春

霜落園林時屆冬稻梁全獲罷三農田家作苦無休息
更聽村墟半夜春

萬籟全收夜已分寒春聲急隔窗聞高齋識得豐年景
策裊爐香獨自焚

魚米樹

一名康洋樹出宜興其結子似米則
年豐似魚則多水農家以此占年云

春入靈根枝葉抽嘉名聞道數興州求魚緣木須防滯

聚米成林定有秋
砌茨饒他能識
朔庭萱空自解
忘憂
那知望樹占年
好歲歲農家社
鼓稠

湖上田家

湖田上下水漣淪
布穀催耕喚欲頻
最是三春多樂事
更無閒暇度三春

麥宜高地稻宜低
不是田家那得知
水漲溪田千頃碧
清和天氣插秧時

春湖水暖鴨雛肥
傍晚雙雙作隊歸
南畝種完北畝未

夕陽天末掩柴扉

湖上春歸綠柳濃
湖邊新稻看重重
牯牛卧日松船靜
半是漁兒半是農

清曉風和浪不生
一篙烟雨小舸輕
揚鞭堤上尋芳處
滿幅江鄉畫裏行

甲寅三月

上耕藉迴鑿迎駕恭紀

昭蘇景物正勾芒
千畝

躬耕典制詳禹甸三春榮草木周官六禮煥旗常均平何
用郊人耨豐稔遙占太史祥最是

聖情勤保赤歡騰父老列成行

御苑親推步玉田青旗搖曳引祥煙

九重雲擁千官仗萬卉春和三月天樂奏迴鑾鳴鳳管禮

成

帝藉紀瑤編前期時雨霏微灑早卜寰瀛大有年

淡蕩和風霽景開天閑十二駕龍媒香街幾里花如霧

繡陌千塍車似雷
華宇共霑

恩澤普

御園羣仰

聖人來迎

鑿踊躍葵忱切獨愧凌雲獻賦才

御園從耕恭紀六韻

上苑土泉滋

躬耕膏壤肥禮因加

帝藉心是念民依水暖流塍細光融向午暉省耕厘
聖慮終畝沐

恩輝種布珠塵墜犁翻玉屑飛農勞誠可念豐稔願無違
輓轡聲

淥水漲平湖春田轉輓轡耳根鳴斷續眼界樂霑濡漫
厭繁音急從觀生意蘇機心緣力掾不與漢陰殊

治圃

園林入秋後風露肇寒初治圃芟烟蔓呼僮帶雨鋤連

畦清去穢傍砌爽舍虛漫學瀟溪叟窗前草不除

日知薈說


大田之詩曰雨我公田遂及我私忠順之意形於禱祠
親愛之心並非勉強及公田既渥私田亦霑婦子恬熙
樂其樂而利其利仍歸於上之所賜耳自非上之恩德
素建有以淪肌浹髓其孰能誠民心志至於大順如此
哉夷考甫田之詩曰我田既臧農夫之慶即其惠下勞
農之念所以感民者深則其施於政事者固不可考而

必其漸仁摩義非歲月之暫可知矣周禮籥章氏凡國
祈年於田祖則敔豳雅擊土鼓以樂田畯按豳雅之什
曰誕后稷之穡有相之道所謂輔相天地之宜也第厥
豐草種之黃茂即其事也必人事盡於下然後有以輔
成帝命率育之心而黍稷實穎實粟故能為酒醴以祭
先祖而洽百禮其詩曰壽考維祺以介景福樂嘉報之
無已也而籥章氏敔此以樂田畯所以樂田祖也田畯
者古之勞農勸相司耆教稼嘗有功於農事為田祖所

佑者也祈年於田祖而歆豳雅擊土鼓以樂田畯蓋云
田畯是享庶乎有以佐神農氏之治而興我稼穡云耳
且歆豳以祭舉國之民皆與焉於是乎得聞先王服念
勤民康功田功之事先民勤勞稼穡以祇率懿訓之休
而東作西成競相勸勉惟土物愛罔敢怠弛盡人事之
勤獲天時之報此又周公制禮之本意所以為萬世勸
農之法也與

周禮禁原蠶論者謂蠶馬同以天駟房星為祖物莫能

兩大再蠶則蠶盛而馬耗禁之所以蕃馬也蠶既與馬同氣恐蠶盛傷馬獨不忍馬盛傷蠶乎意者校人祭天駟而馬質掌馬政使並掌蠶禁所以禁原蠶者恐其氣竭則來年之蠶不能蕃滋所以節盈虛消長以為阜物育材之本耳究而言之蠶之為用在民而上供絲枲則仍入乎官馬之為用在官而成羣阡陌則仍利乎民聖人之政亦惟斟酌損益與時偕行期於政修物阜而已又何容心於蠶馬之分哉



欽定授時通考卷五十一